



# partii naleraq

21.april 2016

UPA2016/86

**Inatsisartut aalajangiiffigisassatut siunnersuut, Naalakkersuisut peqquneqassasut neqerooruteqartarnermut inatsimmut allannguutissanik siunnersuuteqarnissaannik, sanaartornermi suliallit nunatta pissarititaanik atuinissamik kissaateqartut tapersersorneqarnissaat siunertaralugu.**

Aqqaluaq B. Egede Inuit ataqatigiit aamma Per Rosing Petersen Partii Naleraq

Inatsisartunut ilaasortat Aqqaluaq B Egede Inuit ataqatigiit, kiisalu Per Rosing Petersen Partii Naleraq, siunnersuuteqarput nunatta pissarititaanik atuinissamik, kiisalu neqerooruteqartarnermut inatsimmik allannguutissanik Naalakkersuisut siunnersuuteqarnissaannik tamannalu Partii Naleqqamiit oqaaseqarfigissavarput.

Nunatsinni uagut nammineerluta pilersitatsinnik sapinngisamik nammineq annertunerpaamik ineriartortitsilluta atuinissarput sapiissuseqarfiginerullugu pilersitsisarnissarput pimoorunnerusariaqalerparput tamatumammi kingunerissammagu nunatsinni aningaasarsiornikkut nukittunerulernissarput.

Ileqqutoqqat atuinnarlugit tassalu suna tamaat nunatta avataaniit eqqutissagipput taamatuinnarlu ingerlaaseqarnitta kingunerisaanik sungiutiinnarsimasagut allanngortinniartariaqalerpagut, tassami nuna Naalagaaffinngornissamik anguniaqartoq imminnut napatinnerulernissamik pisuussutiminillu atuinerusoq pilersittariaqaleratsigu imaanngitsoq maani pilersinniakkagut tamaasa nalilersussagigut imminut akilersinnaangitsut.

Ajornaqaaq uagut nammineerluta ilaatigut atortussanik imminnut pilersorsinnaagaluarluta suna tamaat ajornartutut nalilersorlugu ingerlajuannarsinnaangilagut, pilersinniakkagut tamaavisa nunatta avataaniit tikerartiinnavissinnaangilagut, taamaaliernerlu tassaagaluarpoq aatsaat killilersugassaq oqarluta taamak ingerlaannarutta qaquguluunnit imminut akilersinnaangilluinnartussaavoq, tamannalu tunngavigalugu maani ineriartortissinnaasagut nammineerluta ineriartortittariaqalerpagut pimoorussinerulerluta.

Narsami sikublock ajunngilluinnartumik ineriartortinneqarnikuuvoq, illut arlallit assersuutigalugu Narsami utoqqaat illuat, piareersarfik, angerlarsimaffillu illu, taavalu Narsarsuarmi ilinniartitsisut illuat taakkulu sulii ajunngilluinnartumik atornerqarput.

Taamaattumik uagut maani namminneq pilersissinnaasagut ineriartortinneqarnerat aallartinniartigit oqalukkunnaarluta imminnut akilersinnaangimmat aallartinneqarsinnaangitsut, soq oqaluttoqaannavippa nunami maani pilersinneqartut tamarmik imminut akilersinnaangitsut.

Sisimiuni takuarput aamma sisorartartut illuutertik namminneq sanavaat, nunatta pissarititaa atorlugu sanaaq, tassalu marraq qammasissiaralugu. Aammalu taanna ajunngilluinnarpoq kisianni tassa nunatta avataaniit tikisitaanngimmat ineriartortinneqanngilaq isiginnaaginnarparpullu soormi taava qammasissianik inissialiunngilagut misilittakkammi takutippaat Narsami Sisimiunilu pilersinneqartut ajunngilluinnartut taavamiuna sooq ineriartortinngikkigut

Aperisariaqalerpugut sooruna taamaattugut? Sooruna nunatta avataaniit tikerartitagut kisiisa imminut akilersinnaasutut isiginnarigut, qanorluunniit ajortigigaluarpata asiujatigigaluarpata ingerlaanngajallu oqulertaraluarpata, kisianni oqanngilagut ajorput imminut akilersinnaanngillat, massa takusinnaareeraluarlugu piffissami sivikitsuaqqami aserfallannerinut aningaasarpasuit atortarlugit, taakkuninngali atuinerput suli annertusiartuinnartillugu.

Apereqqittariaqalerpugut sumi nunami avataaniit tikerartitsinnavinneq naammattugassava? Oqartariaqarpugut ersertuunnagu Kalaallit nunaanni kisimi naammattugassasoq oqarutta uniorpallaarunangilaq ilaa? Nuna imminut pilersuutigisinnaasami ilaannik pigisaqaraluarluni atuinnngitsaq qaquguluunnit annerusumik ineriartornaviannngilaq.

Taamaattumik imminnut pilersorusuttut ineriartorusuttullu mattussorunnarlugit aallartinniarta, tassami nunap inui atorluarneqarnerusuuppata taava misilittakkat annertuumik qaffatsinneqassagaluarput atuinerlu annertusaaffigineqarluni ingerlallualersinneqarsinnaalluni.

Sooruna maani orpippassuaqarata qisuinnavinnik illuliorniartugut, uffalu ilisimallugu ukiorpassunngitsut qaangiukkangata aningaasarpasuit atorlugit aserfallassimasut aaqqissuuteqqittarlugit.

Sooruna naammattunik marraateqarluta sioraateqarluta ujaraateqarluta annertunerusumik taakku atunngikkigut illuliornermut, aap nalunngilarput beton-iliortarluta, kisianni taakku kisimik naammannngillat, tassami amerlanerpaat illut qisunnik nunami qisuuteqanngitsumi sanasarpagut kisianni oqarneq ajorpugut taakku akilersinnaanngitsut, taavalu maani pilersinniakkagut qisuunngitsut inissiatut aallartinneqarpata akilersinnaanngitsutut nalilertarlugit.

Taava oqartariaqalerpugut sanaartornermi ilisimasallit allaanerusunik ilisimasallit atulertariaqalerpagut, nunami maani atortussianik ineriartortitserusuttut, siunissamimi sanaartornikkut nunatta avataaniit eqqussukat kisiisa tunngavigiinnarsinnaajunnaarpagut avataaniimmi eqqussuineq minnerulerpat aamma aningaasarsiornikkut nukittunerulissagatta, aningaasallu amerlanerusut nunatsinni kaaviaalissammata.

Naalakkersuisooqatigiit Naalakkersuisooqatigiinnissamut isumaqatigiissutaanni imaattumik allassimasoqarpoq, issuaaneq aallartippoq; "Sanaartornermi atortut avataaniit tikisinneqartartut annikillisinnaarlugit, Nunatta pissarititaanik atorluanaanerunikkut inerisaasoqarnissaa Naalakkersuisooqatigiit sulissutigissavaat." Issuaaneq naavoq.

Isumaqatigiissuttip oqaariartuutaa tusarnissusia aammalu tapersorsornarlunarluni, taamatullu isumaqatigiissuteqarneq tamakkiisumik illersorparput, kisianni aamma oqaasinnaanera malunnarpoq ukuami siunnersuuteqartut siunnersutaat nunatsinni imminnut pilersornissamut ineriartortitsinissamut tikkuussigaluartoq itigartimmassuk tupigusuutiginnngitsorueq ajornarluni.

Tassami uani siunnersuumi aamma akuersaarneqaraluarpat suliffissat arlallit pilersinneqassapput nunatta aningaasarsiornera nukittunerulissaaq, suliffissaaleqisummi ikinnerulersikkutsigit aamma inuttut

ajornartorsiutit ikinnerulissapput, inuiaqatigiillu nuannaarnerulerlutik imminut pilersortut amerlippata, taamaattumik tamakkua aamma eqqarsaatigalugit Partii Naleqqamiit siunnersuut tamakkiisumik taperserlugu, sanartoornermi ataatsimiitaliami suliarineqarnissaa innersuussutigaarput.

Hans Enoksen